

## KOMUNIKADO DI PRENSA



Fair Trade Authority  
Curaçao

Fecha: 6 febrüari 2018

E-mail: [info@ftac.cw](mailto:info@ftac.cw)

Pietermaai 6

Postbus 136, Punda

Curaçao

+5999 461 00 67

[info@ftac.cw](mailto:info@ftac.cw)

[www.ftac.cw](http://www.ftac.cw)

### FTAC: atenshon riba sektor finansiero i di konstrukshon

Fair Trade Authority Curaçao (FTAC) tin kompetensia den sektor finansiero i di konstrukshon komo un punto di preokupashon. Esei ta bini dilanti den e agènda di FTAC pa aña 2018 ku a keda publiká awe riba nan wèpsait [www.ftac.cw](http://www.ftac.cw). Den e agènda aki FTAC ta trese dilanti ku den 2018 nan lo pone atenshon spesialmente riba e sektor finansiero i sektor di konstrukshon. Análisis hasi dor di FTAC i un ronda di konsulta a mustra ku den e sektornan mensioná tin sospecho di aktonan ku ta limitá kompetensia. P'esei FTAC ta bai hasi investigashon den e sektornan aki.

Presidente di FTAC Alberto (Chos) Romero: “ta importante pa haña un bista di ki manera i kon kompetensia por wòrdu mehora den e sektor finansiero i den e sektor di konstrukshon. Tur konsumidó tin direktamente o indirektamente di aber ku e dos sektornan mensioná. Pa e motibu aki ta importante pa posibel problemanan di kompetensia ku ta okashoná kostonan haltu den e dos sektornan aki wòrdu eliminá”.

FTAC ta bai investigá kon e sektor finansiero i di konstrukshon ta funshoná i unda e rísikonan pa ku kompetensia in hustu ta sinta. Tambe FTAC lo por hasi investigashon mas profundo si tin siñalnan di posibel violashon di e Ordenansa enkuanto Kompetensia. Kaminda FTAC konstatá violashon di e Ordenansa, FTAC lo aktua pa terminá esaki i si ta nesesario imponé un but. Butnan por subi yega te un máksimo di 10 porshento di e volúmen di benta anual total di e empresa.

E agènda di 2018 tambe ta indiká ku FTAC lo kontinuá ku e trayekto di duna informashon i hasi investigashon tokante outo regulashon den asosiashonnan di empresario. Por último FTAC ta planiá pa duna konseho na Gobièrnu riba proyektonan di leinan i regulashon den preparashon o eksistente ku por limitá kompetensia den sierto merkadonan.

Mas kompetensia ta sòru pa preisnan mas abou, mas inovashon, mihó kalidat i mihó servisio. Esaki ta na benefisio di un i tur.

FTAC ta hasi un apelasion na tur persona ku tin informashon òf siñal di posibel violashon di e reglanan di kompetensia, manera palabrashon di preis, repartishon di merkado i mal uso di poder ekonómiko pa mèldu esaki na FTAC. Riba e wèpsait di FTAC [www.ftac.cw](http://www.ftac.cw), tin un formulario pa hasi entrega di keho. Siñalnan di posibel violashon por wòrdu entregá anónimo tambe.

E agènda pa 2018 di FTAC ta riba e wèpsait di FTAC [www.ftac.cw](http://www.ftac.cw).

*Bo ke mas informashon? Tuma kontakto ku sr. Albert Scholten, direktor di FTAC.*

*E-mail: [info@ftac.cw](mailto:info@ftac.cw), telefòn: +5999 461 00 67.*